



# Paneeraq Siegstad Munks prædiken påskedag

**Taler**

Paneeraq Siegstad Munk  
Biskop over Grønlands Stift

**Dato**

9. april 2023

**Sted**

Vor Frelser Kirke, Nuuk,  
Grønland

## Oqaluuseq Poorskip ullua 9.april 2023 Annaassisitta Oqaluffiani

### Biskop Paneeraq Siegstad Munk

Poorskip iivangiiliuani oqaluttuarineqarpoq annaassisunnguaq toqunerata kingorna ilivermut ilineqarsimasoq, ilerfiarneqartoq, ullullu pingajussaanni poorskip ullaavani makissimasoq tusarparput.

Angutip inuusuttup qaqortunik atisallip arnat pingasut ilerfiartut oqarfigai: “Annilaaqinasi! Jiisusi Nazaretimioq sanningasulimmut kikiattorneqarsimasoq ujarparsi. Makissimavoq, maaniinngilaq. Takuuk, aajuna ilineqarfia!”

Toqukkut qimagaasimasugut annaasaqarnitsinni misigissuseq sungiusimanngisarput, asasatta toqukkut qimaguttup soorlu tammartutut annanera oqaasertaleruminaatsittarparput. Timi anernerup qimassimasaa ilisarnaraluartoq amigaateqartarpoq, eqitsisarneranik - toqusimasulluunniit pissusii, timi takunerani misigitinneqartaraluartut isaasalerlugu tammartutut ittarput.

Soorlu Jiisusip nammineq oqaasii malillugit Tallimannorneq tannaartumi misigissuseq annaasaqartumut takkuttarpoq: Guutiga guutiga sooq qimappinga?

Taassaanngitsumik aliasunneq qimagaasutut misigineq, maqaasineq oqaasertalerneqarpiarsinnaanngitsoq aqqusaartarparput. Misigissutsimi tassaniissimassapput taakku arnat pingasut ilerfiarlutik ornigukkamik aqqusaagaasa ilaat.

Jiisusip sanningasulimmi kikiattugaalluni ilumut inuinnartut misigissutsit aamma pigisimagai oqaasiitigut timitarsivarput. Iluitsumik inuugami iluitsumillu guutiulluni. Taamaakkami oqartarpugut inuttut sulluunniit misigissutsit aqquusaakkagut Jiisusip nammineq aqputigisimammagit sulluunniit pillugit attavigiuarsinnaagipput, qinnutigullu tusarneqartartut.

Toqukkut qimagaasimalluni aliasunnerup suna tamaat sunnertarpaa, nerisassat mamassusaat, sinik iluamik soorlu naammatsinnarani, inuunermut perusussuseq allaat kimeerukkallarsinnaasarpoq.

Ullumili oqaluttuarineqarpoq poorskip ullaarsuani imaannaanngitsumik pisoqartoq. Angutip inuusuttup qaqortunik atisallip arnat ilerfiartut oqarfigimmagit, *Jiisusi kristusi tamaaniingilaq makissimavoq.*

Poorskip ullaavani uppernarsineqarpoq ilumut Jiisusi Kristusi tamaaniikkunnaarsimasoq, toqusuniik makissimasoq. Tamannaluuna qitiusoq upperisatsinni, tassa Guutip ajugaqanngitsuugami - sapigaqanngitsuugami toqu taarlu ajugaaffigalugit makinnissarput aqputissiuukkaa. Jiisusi tamaaniikkunnaarmat Guutip kisimiilersinngilaatigut, maannami peqataavoq Anersaakkut Illernartukkut.

Tamannami aamma meerannguulluta kuisinnitsinni aqputissiuunneqarpoq, kuissutikkummi annoraaq qaqortoq nutaaq atisarparput, kristumiut puuat. Tupitut ittoq, anaanap illiaasut ini eqqissinartoq - qasuerfissamik iserfigalugu angerlarfiujuannarsinnaasoq. Sumorsuaq angalaqqaarata, silarsuami ujaasiusaaqqaarata ininnguaq matuinnarlugu Naalagaq isertortumiittoq ornittuaannarsinnaasarput.

Inuunerup aqputaani tupeq, soorlu aasami piffinnut alianaatsunut angalallugu toqqissinarisangarput upernassalermat erinigisalerparput angallatilaarnissaa.

Taamaapportaaq Kristumiusut inuunermi tupeq eqqissinartoq atisimasarput, inuunerup assigiinngitsunik aqqusaartitaani peqatigiuagarput. Tassa taanna sanningasoq kiinnakkullu sakissakkullu uatsinnut ikkunneqarsimasoq ilisarnaataavoq. Anisarnitsinni isertarnitsinnilu paarsiuartoq.

Poorskip oqariartuutigaa nunarsuarmi inuunerput

eqqissinanngitsorpassuaqaraluartoq, ersissanngitsugut. Guutip asanninnera ersinermik ilaqanngilaq, ersisorlu asanninnermik naammatsissimanngilaq.

Tamakku tamaasa pillugit Jiisusi Kristusip toqusunit makinnera, uagutsinnut uppertunut kimeqalerpoq. Tupermi qanorluunniit atugaqaralarutta neriuutissaqalerfik. Asanninnermillu naammatsissimanngikkutta Jiisusi Kristusi aqputaavoq eqqissinermut. Tassa taanna oqaluussissutigisarpur, upperisattalu qiterisaa.

Sisamanngortoq illernartumi unnukkut pisimasoq, Jiisusip tigusaagami misigisapilui silarsuatsinni takujuarpagut suli. Miserratigineqarsinnaanngilaq inoqatigiit akornatsinni suli soqqusaatsuliortoqartarmat. Nunani allani kisimi taamaanngilaq, nunatsinni aamma oqaatsitigut, socialmediatigut, timimik annersaanikkut pissusilunnikkulluunniit inoqartarpoq ersisitsiniaasunik.

Soqqusaanneq soorlu naammanngitsaq, qaavatigut uppertuusugut nikassarneqartarpugut, illaatigineqarlutalu nunami allamiunut maleruutiinnarnerarluta. Tamannali eqqunngilaq, ullumikkut najoqqutarisat tusarnaarluariarsiuk. Oqaanneqaratta inuuneq **minguitsoq piviusorlu** pillugit inooqqulluta.

Upperisap politikkillu akulerussuunneqarlutik tunngavigalugit nunamik aqutsineq mianernartortaqarmat taamaaliorusunnigilugut. Namminerlu ataqqineqarnissarpur pinnagu, Guutilli ataqqinaatissaanut palasiusugut kiffaangatta.

Qanga pisimasuniigata, ingutsisaqattaarata, annersaanata, ersisitsinata, suleqatigut mamarlernagit, sapiissuseerunnatalu perusuppugut.

Tamakkuukua kristumiussutsimi ungangilluinnarigut, akuersaanngilugut naalliutsitsinerit, akuersaanngilugut ersisitsinerit, akuersaanngilugut soqqusaatsuliornerit. Qinnuppagulli taamaaliortut nammineq eqqississutissatik nanissagaat. Taamaaliortarunnaarnissamut ikiortittoqarsinnaavoq.

Kalaaleq sapilersitaasimanngilaq tamanna uteqattaaraluarpassulluunniit upperilernaviannigilara, avatangiisimini peqqarniissinnaasartumi inukulunnguulluni killissaqarnini misigisaqigamiuk maniguulluni inuuvoq.

Sungiusartuarpoq anorersuit takkuppata isumatusaarnikkut  
oqquiffissaqarumagami.

Inuiaqatigiinnilu aaqqissuussaasimanitsinnik nikassaaniaannarani ullaat  
tamaasa makittaraaq, sapinngisannguaminillu inuiaqatiminik  
kiffartuussisarpoq. Guutip saammaanneq uagutsinnut atugassarititaa  
naapertorlugu.

Upperisarput pillugu, nikallunngilagut toqqissiffigigatsigu.  
Oqaluussissutigineqartoq siulitta nammineq toqqagaat,  
kiffaanngissuseqarlutalu upperiumasarput pilluaqussut kimittooq, asanninneq  
angingaartoq Guutip uagutsinnut tunniussaa - inuuneq. Nammineq  
anersaartorsinnaajunnaarutta angerlarfissarput Guuti, Guutip inaani tamatta  
katersorneqarumaaratta erinigisarput.

Ungangisarigatsigu oqaluttuat Guutip imminiiginnarsimanngikkaatigut,  
ullaallu tamaasa pilluaqqutinik periarfissanillu nutaanik tunisarmatigut.  
Peqatigiuaannarmatigullu allaat kiserliornitsinni.

Taamaammat nunatsinni assigiinngisitaarneq ammip qalipaataa pineqarpat,  
kinguaassiutitigut soqutigisat pineqarpata, upperisarsiortullu ilai  
tupinnarluinnartaraluartut ilagiittut upperaarput tamatta inissaqartitaasugut –  
oqaloqatigiinnerlu eqqissinermik anguniagalik, neriummik timitaliisoq  
illersortuassavarput inuunitsinilu toqqammavigalugu. Neriuppunga nunatta  
siunissaani tamanna suli pingaartinneqarluni attatiinnassagipput. AMEN

**Kilde**

Manuskript tilsendt af taler

**Kildetype**

Digitalt manuskript

**Tags**

Første tekstrække, Prædiken, Prædikener fra 2000-tallet, Påskedag

**Relateret**

Elof Westergaards prædiken påskedag  
9. april 2023

Henrik Stubkjærs prædiken påskedag  
9. april 2023

Henrik Wigh-Poulsens prædiken påskedag  
9. april 2023

Mads Davidsens prædiken påskedag  
9. april 2023

Marianne Christiansens prædiken påskedag  
9. april 2023

Marianne Gaardens prædiken påskedag  
9. april 2023

**URI**

<https://www.dansketaler.dk/tale/paneeraq-siegstad-munks-praediken-paskedag>